

## Eënzaeme vrouwen

door Engel Reinhoudt

Afgelôpe naejaer dee collega Frans van der Heijde z'n beklag over spam. Spam dat bin e-mailtjes mie reclame enzô, vuulte in de post. Die kreeg zelfs emails van vrouwen die a d'r eigen anbooë. Ik kenne Liza nie, mae ik vond het nog a rigoureux. Je kan toch zômae nie een vrouwe in 't vuulnisvat steke? Zelf è 'k nooit last ehad van spam. Toet voe kort, toen begon het. Ik ao schoenen besteld via internet. Daenae was 't ek van den dam. Of a 'k ok gin over'emden most è? Toen winterjassen, e-bikes, reizen, seksartikelen, ondergoed en gae zômae deur. Op een gegeven ôgenblik kreeg ik gratis een onderbroek over de echte post. Ik ao d'n a een dag of drie edroge toen a 'k het tegen iemand verteld'n die a t'r verstand van ao. "Stiert 'n onmiddellijk vrom, anders zit je d'r 'k weet nie oelank an vast en betaele za je!" Afijn, ik è d'n glieke uut'edae en terug'stierd, werm in d'enveloppe. M'n computer is schoan'emaekt en de vuulte is op'ehouwe. Temist'n dat docht ik. Krieg ik toch veêrtien dagen 'elee een e-mailtje van een zekere Liza. Ze schreef a ze lank gearzeld ao, mae a ze noe zô een behoefte an een vriend ao a ze me uutnoadigd'n om telefonisch contact op te nemen. Daè was ok een foto bie. Ik vond het wè een dappere vrouwe. Eêst deur Frans eprullemandeerd en dan toch nog de moed è om vadder te zoeken. Ik klikt'n de foto an en, mensenlieve, daè stoeng ze dan mae es poeternaekend op. Frans ei eêl wat emist. Ze was behoorlijk an de maete en zô jonk was ze nie mî. Ze was vanonder a glad kael, mae op d'r oad ao ze nog lank blond aer. Over d'r ôgen zat een zwart balkje. Dat ao eigenlijk d'r schaemte motte bedekke, mae dat was kennelijk naè boven eschote. Ik maekt'n d'r zonde van. Dan è je toch nie vee ola a je zô op de foto gaèt. Ik docht 'r over om ze op te bellen en ze te zeggen a ze dat zô nie doe most. Voe a'k zôvarre was, zag ik bie toeval in de krante, bie de 'Kleintjes', een blokje mie advertenties van vrouwen die a ok op zoek bin naè een man. En wie stoeng 'r bie? Liza, voe vriendschap en meêr! Of a je mae belle wou. Daè were ok nog negen are advertenties, aol van lustig vrouwvolk. Wee dust ik nie goed te bellen. D'n aren dag stoeng 'r wee tien advertenties. Noe were het andere naemen, mae de booschap was 't zelfde. Neem telefonisch contact op en je wor op je wenken bediend. Inmiddels bin 'k 'r achter dat 'r elken dag tien vrouwen een oproep doe. Nie alleêne in de PZC, mae ok in andere kranten. Daè motte toch vee eënzaeme vrouwen weze. Weet je wat, docht ik, ik belle ze eên voe eên op en dan stel 'k voor a ze onderlieng een telefooncirkel begunne. Dan è ze elken dag contact, wê nie bie een vent, mae dan è ze toch even een praotje. Toen è 'k Liza ebeld. Ze begon glieke mie schatje zus en schatje zô. Of a 'k 'r ok zin in ao? Afijn ze ieuw me an de praot mie van aolles en nog wat en op d'n duur gieng ze vertelle oe a ze d'r bie lag en ik mocht dan zôgenaemd eur betaste. Ik ao nie vee gelegenheid, wan ik ao in d'n eênen and de telefoon en in d'n aren and een bakje koffie. Beroer dan mae es een kaele poes om tien uren 's ochtends deur de telefoon. 'k Wiere kwaed en 'k zegge tegen d'r da ze d'r balkje van voe d'r ôgen mae omlaege most doe en het liefste mie een angslot d'r op. Toen è 'k Jenny ebeld, wan die telefooncirkel liet me nie los. Die vroeg direct of a 'k d'r jarretels los wou maeke. Dat wa dus nie vee beter, bovendien praott'n ze net eênder as Liza en kreeg 'k d'n indruk at het hetzelfde wuufje was. Toen è 'k nog naè Emma (50plus, omgeving Arnhem) ebeld. Die vond het wè een goed idee zô een telefooncirkel. Mae ik most dan elken ochtend eur opbelle, om a zie aars misschien vergete zou om een volgende vrouwe op te bellen. Nou, ik bin de beroerdsten nie, dus dat è 'k edae toet a de rekenienge van de telefoon kwam. Bie mien gien toen het belletje rienkele. Ik ao behoorlijk g'investeerd in de bestrijding van eënzaemheid onder het vrouwvolk. Om precies te wezen € 43, 85. En eholpe eit het nie, wan elken dag bin d'r nog steeds tien advertenties in de PZC.

*Reacties: Werrilaan 21, 4453 CA 's-Heerenhoek. E-mail:cn.zeeuws@zeelandnet.nl. Nae een maend is dit stikje ok nae te lezen op [www.zeeuwsezanger.nl](http://www.zeeuwsezanger.nl)*